

– Mo dad si o thagar, mi day si i thagarni, a me sinyom thagarengoro raklo. Ola nashti avena tumare khereste te dikhen kate beshesa. Tumare, po na othe, mozhe te aven ko byav, ama akana, ma te zhan te ahaven pes so si, soske amare nanay te oven kaili te ovas kupate.

– Me – phendzhas i chhay – pale ka vakerav me dayake.

Vakerdzhas i chhayori, ama o roma kato ahavde, kato shunde pe chhayakere mostar da, kay chaches si thagareskoro chhavo, darandile o roma, len po bagashi, vazden pi tsara i sigo, sigo nashen avere dizate, soske ka chhinell o thagar lengere menya. Ama oy da tsidela, soske so vakerela o dad, davka ovela. Nanay ni lil te yazdinel e rakleske, ni nishto nanay. Lel, mukel pi papucha, othe kate sine i tsara lengiri, mukel upral ki papucha po mindili da, uklistili ki tsara i nashle. O raklo kana gelo te rodel la, so te dikhel... I tsara nanay othe.

– A, kate vazdinde pi tsara kalka manusha, kate geli i Gyulizara? So baro dives na dikhlyom la.

I phuchela e komshien:

– A be, manushale, athe isine ekh tsara, i Gyulizara beshelas athe, kate gele, kate si?

Ek romni phendzhas e rakleske:

– A, chedo, shun so ka vakerav tuke. E thagareskoro chhavo la mangela. Ola nashle kalke dizatar te na chhinell o thagar lengere shere. Nahle atar dur, kon zhanel kate si?

I ov da akana, but dehala la, o iloro dukhandilo les. Ama li i chhayori da but dehala les. Li oy vlyubisalili leste, sefte lyubov kerela. Lilyas te rodel la. Akariga rodela la, okoriga rodela la, nashti arakhela la. Tsidindzhas te zhal peske khere, ama beshlo ekhe bareste – rovela hem molinela pes:

– E bre, Devla, mo ogi rovela palal me phiramnyate! De man Devla te resav man lasa, pale sora ako mangesa mo ogi da le! Ama zhi kate na dikhava la, mi yakh nashti phandava. Mangava te dikhav man lasa te vakerel mange soske nashli bez te vakerel mantse.

I meniya da lakiri, kay arakhlas, akharela palal peste. Beshela ko bar, dikhela i menya i rovela. Bashladindzhas te gilyabel peske – hem rovela, hem gilyabela, pe gilyasa phruchela la soske nashli lestar. O vakwti i chhayori iklyola palal leste. Phandela leskere yakha vastentsa. O raklo birden pendzhardzhas la, a oy phruchela les:

– Soske rovesa? Sar arakhlyan man tu athe?

– Sar arakhlyom tut athe? Tu te zhanes, me kobor rodava tut! Ekh masak sar rodava tut! Gav-gavendar, diz-dizendar phirdzhom te rodav